

四庫全書

集部

欽定四庫全書

橋李詩繫卷三十四

平湖沈季友編

三國吳

義姑陸鬱生

陸氏績之女生于鬱林名鬱生海鹽人年十三適
同郡張白白溫弟也素有才名溫因使蜀大帝恨
之以事幽溫白亦坐廢謫死異郡鬱生嫁甫三月

以苦節終姚信有表稱之曰鬱生少履貞特之行
幼立匪石之節婦禮未卒遭羅家禍抗聲昭節義
形于色冠蓋交橫誓而不許奉白姊妹姦讎之中
踏履水火志懷霜雪義心固于金石體信貫于神
明送終以禮邦士慕則臣聞昭德以行顯行以爵
苟非名爵則勸善不嚴故士之有誅魯人志其勇
杞婦見書齊人哀其哭乞蒙聖朝褒以義姑之號
以厲兩髦之節則皇風穆暢士女改觀矣

吳趨行

蘭滿蓋重簾唯有遠相思
藕葉清朝釧何見早還時

南齊

賢娼蘓小小

小小一名簡簡名倡也居嘉興縣南死即葬此人
呼為賢娼巷墓旁有大井舊生雙桃宋紹興初衣
白以出人多畏之因鎮以塔後宋路分行天心法
以驅之遂不復見向傳小小居錢塘墓亦在錢塘

然據唐人諸詩俱云在嘉興宋司馬樵才仲初在洛下晝寢夢一美姝牽帷而歌曰妾本錢塘江上住花落花開不管流年度燕子銜將春色去紗窓幾陣黃梅雨才仲愛其詞因詢曲名云是黃金縷後五年才仲以子瞻薦為錢塘幙官為秦少章道其事少章續其後詞云斜插犀梳雲半吐檀板輕敲唱徹黃金縷夢斷綵雲無覓處夜涼明月生南浦頃之復夢美姝迎笑曰夙願諧矣遂與同寢自

是每夕必來不逾年才仲得疾而死死之日有見
才仲攜一麗人自湖上登舟云或曰宋有蕪小娟
亦名小小墓在錢塘樵事蓋小娟也詳見七修類
稿

西陵歌

妾乘油壁車郎騎青驄馬何處結同心西陵松柏下
宋

女給事沈氏

沈氏稗史彙編云秀州人聰慧能屬文少選入宮
為給事中孝宗嘗試六宮守宮論沈文最佳其發
端云甚矣秦之無道也宮豈必守哉上悅擢為第
一第溥為貢士就試春官沈贈以詩時競傳誦之
其餘詩詞不多見或云為明孝廟時宮人未知
孰是

贈弟

自少辭家侍禁闈人間天上兩依稀朝隨鳳輦趨青瑣

夕捧鸞書入紫微銀燭燒殘空有淚玉釵敲斷竟無歸
年來望爾登金籍同補山龍上袞衣

蔣廿二孺人

蔣十八居士與其妻廿二孺人皆海鹽人日誦大
乘經四十年同日更衣焚香書頌而終居士頌曰
這個幻身四大合成今日分散各歸其根諸幻既
滅灰飛煙絕如空中風猶碧天月既無障礙又能
皎潔一切永斷無復言說孺人頌錄于左

頌語

看過蓮經萬四千平生香火有因緣
西方自是吾歸路
風月同乘般若船

法雲尼正覺

正覺海鹽人樞密郭三益之孫女適雲間葉氏早
寡誓節為尼居法雲菴能詩有一絕載邑史

絕句

春朝湖上風兼雨世事如花落又開
退省閉門真樂處

閒雲終日去還來

孫夫人

孫夫人秀州鄭文妻也文久寓行都孫多寄以閨詞一時傳播酒樓妓館皆歌之

詠雪

朱樓向晚簾開六花片片飛來無奈熏爐煙霧騰騰扶上金釵

元

貞母禹淑靜

禹氏名淑靜字素靖吳守正妻居崇德石門鎮元
季苗獠之亂亟與夫撻舟以遁苗及之叱淑靜止
淑靜度不免遂抱幼女投水死明日得尸僵立如
生藁葬其地守正入越亦死兵間遺孤德昂無依
去金華山中為僧後渡錢塘省墓宋學士瀛序以
送之稱其至孝有儒行會修元史德昂入京以母
死事告于史氏遂得列傳歸廬母墓榜曰白雲先

壠鎮人表為貞母阡徐一夔有記胡奎有詩云石
門山前箭如雨朝別良人暮為鬼石門山下百尺
泉一日身死名千年至今石門山下路烈婦人稱
禹家墓墓前斜日一僧歸即是當年十歲兒又明
初德祥法師詩云雙樹不單伐土中無怨根雙魚
得一網水中無怨魂石門水不淡不著無義金石
門墳不高凜乎三尺刀

傷亂

何處行避苗破船觸枯荇不如水底魚翻身入清冷

芙蓉妓

嘉禾張司令亡其名富而好禮慕楊鐵崖名往迎之鐵崖謂其不知書弗應司令乃延鮑恂為師受業焉後迎鐵崖乃往席間以妓奉酒妓名芙蓉酒名金盤露鐵崖題句妓即應聲答之鐵崖撫掌笑曰妓能文其主可知矣辭去時司令出米滿載送之云是鵲糧鐵崖素愛鵲不能却隨訪顧阿瑛召

瑛之鄰人貧者分給之而去又楊至嘉禾貝廷臣
以書幣為乞吳越兩山亭志并選諸詞人題詠楊
即為命筆稿將就夜已過半俄門外有剥啄聲啟
視則皆嘉禾能詩者也率人人持金繒乞留選其
詩楊笑曰生平三尺法亦有時以情少借若詩文
則心欲借眼眼不從心未嘗敢欺當世遂運筆批
選止取鮑恂張翼顧文暉金炯四首謂諸人曰四
詩猶為彼善于此諸什尚須托胎耳然被選者無

一人在諸人相目驚駭固乞寬假得與姓名至有
涕泣長跪者俱揮出門外閉關藏燭曰風雅掃地
矣

答楊鐵崖

芙蓉掌上金盤露

楊

楊柳頭邊鐵笛風

妓

明

宮正司女史黃婉

黃氏名婉嘉興永樂鄉人

後析
秀水

父永生婉有異徵

幼敏慧通詩禮善文詞洪武中選入宮為宮正司
女史洪熙元年以年老奉敕放歸有司歲給米帛
宣德八年卒葬秀水列字圩楊家村有詩一帙皆
歸後所作歲久蠹蝕不全可讀者僅十餘首載在
族譜故選錄之

孤松

孤松生幽磴落落蒼龍骨可憐托處卑掩抑干霄質蕭
艾在崇岡春風氣蓬勃不有歲寒心寧似千年物

還家作

憶昔辭家四十霜，嘗攜彤管侍昭陽。
點班夙負君恩重，退老還霑聖澤長。
弟妹相親真乍識，庭幃何處更堪傷。
宮妝白髮歸來女，紫袖空餘惹御香。

遊仙詩二首

東皇夜宴水晶城，玉樹瓊葩相映明。
鶴背坐看波底日，酒曛風細露華清。

碧海芙蓉五色開，仙娥分辦列妝臺。
身同蝴蝶多遊遍，

不是南華夢裏來

朱孺人妙端

妙端字靜菴詩緯又作令文字仲嫺海寧人永宣
間尚寶卿祚次女歸光澤學諭周濟後因海溢移
家海鹽故淑秀集及明詩粹明詩妙絕俱作海鹽
人年八十餘終閨閣著作之富無過靜菴者有詩
集十卷遺集五卷雜文史論五卷時稱為女中詩
豪以所配非偶每形諸吟詠嘗讀易安詞題云一

代才華真可惜錯將閒恨寄新詩籬落見梅云可
憐不遇知音賞零落殘香對野人又某使君有一
青衣曰寒梅妻亡欲圖再娶青衣過靜菴泣訴靜
菴曰吾能止之因題一絕于扇令持視使君云一
夜西風滿地霜麤麤麻布勝無裳春來若覩桃花
面莫負寒梅舊日香使君感其意遂不復娶其詩
才致清贍聲調遒健平平舒寫自然嫺麗無愧名
媛矣

采蓮曲

五月薰風至輕舟出南浦不愛蓮花紅惟采蓮苦君
去不思家妾愁如亂麻紅顏易憔悴惆悵不如花

讀鸚鵡賦作

誰云禰正平剛傲而慢侮載讀鸚鵡賦忠誠照千古清
音悲且和羈愁益淒楚阿瞞肆梟雄直視何足數黃祖
鴛下材焉能與君伍玉碎真可嗟珠沉竟何補鳳鳥攬
德輝賢人相時輔天地正昏蒙君禍良自取不見商山

翁深藏避豺虎

白門懷古

炎精已熄兵戈起漢苑青青草千里長安日晚歌布乎
金刀血染權臣死奉先本非王佐才忠言棄斥成嫌猜
區區豈是老瞞敵孤城坐守真堪哀白門已下身將戮
搖尾求生尚何欲座上應無大耳公鴟鴞又啄奸雄肉
扁舟我來事已非登臨懷古徒傷悲淒涼遺跡不可問
荒煙落日號狐狸

春睡詞

茸茸芳草含新綠露井天桃錦雲簇石闌干外早鶯啼
又喚春光到華屋綺窓花影搖玲瓏玉人夢破春溶溶
雲鬟半暎鳳釵滑枕痕一縷消輕紅香汗輕輕透衾溼
含情欲起嬌無力海棠庭院鳥聲和睡足東風一竿日
從軍行

束髮從飛將長驅下玉關秋霜明寶劒朔雪擁雕鞍曉
角邊城苦悲笳旅夢殘何時淨疆場歌吹入長安

平望舟中即事

獨坐蓬窓下挑燈憶別離
旋沽平望酒細詠魯公詩

唐顏

魯公有登平望橋詩

遠寺鐘聲動孤村月上遲
含愁緘尺素慰我

北堂思

客中偶成

異鄉久為客風雨阻歸程
遠岸數峰碧孤舟一葉輕
蓬窓殘燭在煙樹早鴉鳴
坐待東方曙依稀見海城

題明因尼寺陳後主所建

六代興亡似擲梭
空留尼寺傍山阿
殘碑猶識金仙事
國破誰傳玉樹歌
繞屋煙霞供笑語
一龕燈火隔松蘿
由來陵谷皆遷變
湖水依然自綠波

題探梅圖

一筇秋老踏蒼苔
為有南枝遠徑開
小礪風輕歌影瘦
孤山雲暮冷香來
尋詩曾共巡簷笑
問酒還同步月迴
今日重過幾惆悵
翠禽啼處獨徘徊

金陵懷古

石城風起浪聲齊
六代興亡動客思
吳苑落花啼杜宇
宋臺荒草走狐狸
殘香猶染胭脂井
遺恨空傳璧月詞
誰道鍾山佳氣歇
真龍又見起鍾離

吳山懷古

萬里中原戰血腥
宋家南渡若為情
忠臣有志清沙漠
庸主無心復汴京
北塞春風啼蜀魄
西湖夜月照瑤箏
百年興廢空陳迹
回首吳山落照明

春雨

溼雲漠漠雨如絲
花滿西園蝶未知
金屋曉寒鶯語澀
畫樓春晚燕歸遲
宮桃有恨啼紅淚
煙柳多情斂翠眉
檀板金尊久寥落
孤城愁聽角聲悲

湖曲

湖光山色映柴扉
茅屋疎籬客到稀
閒摘松花釀春酒
旋裁荷葉製秋衣
紅分夜火明書屋
綠漲晴波沒釣磯
惟有溪頭雙白鳥
朝朝相對亦忘機

夜坐

吳蠶初出悄無眠數盡更籌覺暮寒柳色弄陰春已暝
角聲吹月夜將闌金爐火冷沉煙細羅幌風生蠟炬殘
獨坐空庭望銀漢碧天如水露溥溥

采蓮曲

采蓮復采蓮水深清見藕欲折紅芳枝綠刺傷儂手

惜春

挂樹遊絲旖旎撲簾飛絮輕狂杜宇喚將春去小桃落
盡紅香

柳枝詞

樓外春風吹柳枝
枝頭新月鬪蛾眉
綠陰留待昏鴉宿
莫折長條贈別離

吹簫士女

侍寢昭陽下直回
紅蕉花底獨徘徊
鳳簫偷得梨園譜
閒向深宮奏落梅

遊仙詞

洞天春暖碧桃芳
瑤草金芝滿路香
吹徹玉簫天似水

笑騎黃鶴過扶桑

長信宮詞

長信深沉天路遙
玉階涼露溼宮袍
不辭團扇輕拋擲
雙燕俄驚別舊巢

虞姬

力盡重瞳霸氣消
楚歌聲裏恨迢迢
貞魂化作原頭草
不逐東風入漢郊

竹枝詞二首

西子湖頭賣酒家春風搖蕩酒旗斜行人沽酒唱歌去
踏碎滿隄山杏花

橫塘秋老藕花殘兩兩吳姬蕩漿還驚起鴛鴦不成浴
翩翩飛過白蘋灘

病中作

夜別寒燈夢不成擁衾危坐到三更不知何處吹羌笛
落盡梅花月滿城

秋日見蝶

江空木落雁聲悲
霜染丹楓百草萎
蝴蝶不知身是夢
又隨秋色上寒枝

閨怨

啼鳥驚回曉夢醒
起來無力倚銀屏
蛾眉未得張郎畫
羞見東風柳眼青

春蠶

桃花落盡日初長
陌上雨晴桑葉黃
拜罷三姑祭蠶室
漸籠溫火暖蠶房

染甲

金盤和露搗晴霞紅透纖纖玉筍芽翠袖籠香理瑤瑟
綠陰新綻海棠花

虞節婦娘

虞氏名娘海鹽人孝廉勲姪女也幼通文藝年十
六歸董涓兩月涓暴死娘哀慟欲絕歎曰我不從
官人死得復見官人如生者庶長瞑乎乃自述其
夫狀貌募工刻畫而自雕繪之既成大哭曰官人

今果如生矣具酒炙饗之寢興盥櫛裘葛更襲無
異生人久而有靈顙忽款款出汗兩袖時舉湄父
以為怪投之火嫫遂鬱悒而死許雲村為之立傳
有詠物絕句十餘首

詠菊

移種春苗愛護周柴桑無主為誰秋寒芳甘抱枯枝萎
羞墜飄風逐水流

詠竹

自矢貞心古井泉清寒徹骨自堪憐相看歲暮青青色
歷盡冰霜戴一天

彭夫人淑慧

彭氏名淑慧嘉興人比部輅之女大理沈玄華繼
室

秋閨迴文

秋江度雁遠鳴孤景寂霜天曉宿鳥愁舊戀深時憶妾
別新傷劇日思夫樓憑攬鬢羞凝翠鏡舞窺人怯點朱

浮靄盼殘淒想結修睽信羽落關榆

王烈婦月妝

月妝海鹽向升妻早寡矢節姑欲以從子為後月
妝泣曰吾死今其時矣遂自縊嘉靖戊戌歲也

絕句二首

孤燈一盞照空房四壁蛩聲欲斷腸休怨淒涼眼前事
自燒前世斷頭香

平生節孝兩無成遺笑人間作話名寄語湘君賢姊妹

東風回首莫關情

曹氏

曹氏平湖人適諸生陸大初夫赴省試病革寄夫
一絕而卒沈懋孝為立傳

寄夫

金風吹散碧天雲雞骨支牀體似焚夢想吳山無限恨
對人含淚惜劉蕡

張烈女

張氏嘉隆間秀水張組女居常與女伴好稱述古
烈女節孝事年十四許字同邑諸生劉伯春春少
負才名未娶卒女聞變號泣截髮誓不更適自為
詩哭之足不踰閭口不茹葷三年服闋即絕食旬
日死時年二十舅姑迎柩合葬焉

哭夫

妾身未識良人面良人何事先云亡想應胸有五車史
地下召作修文郎妾欲從君即殉死垂白舅姑猶在堂

小叔呱呱方五月伶仃襁褓殊可傷妾本儒家寒素女
感君一聘守綱常妾身不比雲間月三五團圓未幾缺
妾身不比天上星永夜明明旦垂滅南山有石雖云堅
鉅鑿相攻遽殘齧長江有水固云直百里之外路回折
千秋萬古無改移此情此義何休歇妾非矯性以干譽
身心自矢無溜湮終期叔兮三歲強妾當一死來君傍

陸聖姬

聖姬字文鸞嘉興陸太守女適周槩鬱鬱不得志

有詩集王端淑謂其詩景色疎快氣味清芬名列
十六名姬宜矣

和入山居

石徑苔封客到稀
林深白日掩柴扉
攀蘿飲澗猿常出
認嶼盤雲鶴欲歸
竹裏泉聲喧藥碓
簾間嵐氣溼荷衣
杖藜徐步尋詩去
一路春風入翠微

新秋

乍宜涼思袖襟中
雲物窺人似不同
遠岫著煙矜夕翠

倦荷摧露脫秋紅
稍將蕭索添文致
漸益淒其與病容
忽憶夜來山月上
一聲絡緯出花叢

西樓梧月

綠野堂西百尺樓
梧桐揺月一天秋
夜深獨坐清如許
空翠滿身涼月流

桑貞白

貞白字月姝
嘉興人
隆萬間布衣
周履靖繼室纂
組之外留心典籍
先後倡和數百餘首
刪繁擷精

得十之一二題曰月窗詩稿茅鹿門序之閻範淑
懿撫前兒如已出有一女適程之遠初婚旬日程
以宿疾死女盡屏服用哀哭勿休守制終焉崇禎
間有司聞其事于朝立坊旌表有女若此寧非母
德所致乎王端淑曰人謂襄陽詩如清溪白石疎
柳幽蕉清矣未免于薄嗟乎襄陽之厚人未知也
讀月姝詩當自得之

春雨

三月風光好，渾銷一雨中。
苔生延座碧，花落隔簾紅。
啼鳥枝頭澀，遊蜂葉底空。
應知春夢斷，鍼線總無功。

采桑

四月桑郊綠，貧家蠶事忙。
一筐芳草露，兩袖落花香。

山居

山居寂寂俗塵稀，石徑雲封晝掩扉。
摘蕨拂煙攜鋤去，採芝帶月杖藜歸。
疎花傍檻紅侵榻，流水臨門綠遶磯。
風景幽閒堪入畫，半林晴旭翠嵐微。

春夜

更闌獨坐斷啼鴉起凭闌杆望斗斜好句忽成情思洽
梅花和月上窗紗

春繡

一番風雨動春寒庭畔梨花已半殘燕語隔簾人寂寂
金盤滌手繡青鸞

五雲仙女謝彩

彩字五雲秀水人謝彬吾女相傳為璇妃三女臨

凡年十四柔肌纖質不勝綺羅豔冶之態目為神
人適雲間丁七郎未幾尸解而去丁後亦不知所
終詩緯云讀五雲傳至羣仙夜集侑觴高歌使人
有凌雲之想十二美人之稱惟五雲幻甚

遊仙

香風吹下蕊珠宮路遇巴園對奕翁笑問先生何處去
楸枰移在玉蓮峰

贈丁生

三生一笑舊姻盟
石畔桃花月下笙
惆悵滄桑經幾變
于今纔了昔年情

煙雨樓

春風遲我一登樓
紅染天桃綠未稠
百里練光煙細襯
四圍曉色雨初收
漁歌每自蘆中起
畫舫還從雲外遊
我欲騎鯨從此去
須知直北是瀛洲

瑤簪擊玉缶歌

金烏既墜漏箭頻
城頭月挂銀鄰鄰
流光照我四座賓

贈我以酒歌陽春憶昔瑤臺會羣真雲璈玉磬俱列陳
既諷丹籙復清論天花四散縈我身于此一別淪海濱
宿緣未斷旋謫塵厄滿二九始締姻桃花繞洞空白雲
白鶴怨我未返輪靈臺鬱結思未伸庸知鸞馭俄相親
際此良夜逢故人留連莫惜傾玉樽須臾展我眉上顰
從此碧落與清津時修尺一通雁鱗何當解縛重作鄰
淡掃蛾眉朝紫宸

沈恭人紉蘭

紉蘭字閒靚秀水大叅黃承昊室封恭人著有效
顰耑隱賓廬諸稿時閨秀工近體者比比閒靚獨
喜作古詩不為平熟之調七言亦彷彿溫李形管
之盛萃于一門如桐城之方吳江之葉華亭之張
樵李之黃皆近代所希有也王端淑曰恭人賦性
精敏才藝冠世女紅中饋間如振蒙發落惜未見
其全集未免有湘蘭楚橘之悲

禊日懷黃皆令却寄

麗日念古集樂事競水嬉緬思清川上士女介新禔東
簡散芳沼踏青膩紅縞洛陽油花卜開元撲蝶戲蘭亭
聚昔賢文士挾華辭昂首雲中錦惠我曲水詩

春草篇

錦褥襴雲繡天地瑤田鋪月迷花魅倚偎香魂展寸心
翠鎖紅閨怨女思驪山渾水青無情結風輦舞空英英
冶遊款襪私香氣沙畔鴛鴦接紫莖旖旎輕揚媚蜂蝶
膩滑纖腰開笑靨鬪芳偷贈小鬟奇輸却斜眸揉碧葉

露流荆圃曉銜珠荒煙連雨通楚巫長亭助柳悲離別
閱盡年年恨始枯

次外君寄懷

懶性或成癖偏愁往返頻牛衣思舊淚馬首恨羈身故
國梅舒夢江干柳報春畫樓今夜月同照別離人

予自己巳春從宦時仲如陸夫人以小滲不得
面別及予歸自中州又再秋矣聞如又抱疴

賦此代面

仲如所居
有夢蓮堂

幾年萍絮屬他鄉
豈羨維藩向洛陽
纔到故園憐姊妹
又添新淚溼衣裳
庭前梧葉經秋老
夢裏蓮花隔院香
別況不堪常閉閣
碧山風雨自淒涼

歸途風雪

寒雨瀟瀟掩暮扉
長途客裏怯單衣
無端燕子磯頭夢
繚繞隨君到處飛

早春憶外

映日初花隔檻明
春風裊裊透寒輕
傷心怕聽枝頭鳥

莫向王孫歸路鳴

悼柔卿遺扇

物在人亡空自悲
淚痕時共落花垂
泉臺若有回峰雁
寄我衷腸知不知

悼葉瑤期

姊妹才高各不羣
餘音獨惜小蠻羣
一償詩債遊仙去
紫府瑤臺鎖碧雲

幽魂清韻亦生寒
彷彿芳姿夢裏看
庭際月明人寂寂

宛然吟詠在闌干

題寒山文夫人畫菊

問奇十載繫相思
白露懷人又此時
陶令有情君有筆
共分秋色在東籬

黃淑德

淑德字柔卿秀水人
葵陽先生幼女適屠氏早寡
有遺集一卷按邑志淑德太學正憲女適文學屠
耀孫早寡遂奉竺乾之教卒年不滿四十著遺芳

草

秋懷

寂莫不禁秋淒淒獨倚樓露凝砧欲動風冷扇初收征
雁驚殘夢吟蛩引暮愁多情窓外月斜影到牀頭

詠雪

同雲密密四山圍凜冽寒風撼竹扉萬樹有花蜂不採
三山無路客行稀窗間夜坐衣嫌薄爐到更深火自微
惟有煙波江上月漁翁猶帶滿蓑歸

秋暮寄懷孟晚

孤館蕭條落葉紅故人遙隔水雲東
追思往事渾如夢轉覺豪華總是空
徑草亂垂猶帶露庭花漸老不禁風
愁懷縷縷憑誰訴閒倚闌干數斷鴻

七夕

鵲駕成橋事有無年年今夕會
星娥時人莫訝經年隔猶勝人間長別多

沈鳳華

鳳華秀水人修撰自邵女未嫁卒

暮春悼先太史

寂莫當年歌舞臺把杯人去漫徘徊
可憐荒却三條徑爛漫春花只自開

項孺人蘭貞

蘭貞字孟晚秀水太學黃卯錫之室著有裁雲草
月露吟寒山陸卿子為序其詩最工寫景清婉有
致臨沒書一詩與卯錫訣別曰吾于塵世它無所

戀惟雲露小詩得附名閨秀後足矣如幽人心賞
間翛然弄秋月晚風吹月上孤鳥帶雲還檻外繁
花隨意茂夢中芳草傍愁生野鶴閒雲身外伴落
霞飛鷺景中禪惟有秋風解人意故吹魂夢到君
旁為語王孫須努力閨中應不悔封侯俱集中警
句也武林徐野君曰三吳閨秀自陸卿子徐小淑
而外不得不以此事推君王端淑曰夫人玉碎珠
沉猶惜詩之不傳豈蛾眉凡質乎風淒月淡鳥怨

花愁中無三寸枯毫徒為七尺土木矣選其諸詩
音節清潔居然名手

揚州野泊

長林日暮行人少淮揚古渡聞啼鳥聞雲來去數峰青
極浦寒煙浮樹杪岸闊潮平一雁過木蘭舟蕩採蓮歌
荒邨漁火半明滅新月如鉤映薜蘿忽聞野寺疎鐘動
蘆葦簌簌江風送徘徊枕上意如何城笳吹起江南夢

聞雁

明月照蒼苔橫空一雁來影翻飛葉墮聲帶晚風迴塞
外征人思閨中少婦哀坐憐砧杵急嘹唳又相催

過天竺

嵐氣侵衣袂輕風拂鬢髮徑深芳草合林靜落花殷人
集煙中寺僧歸樹杪山崎嶇探勝槩贏得此身閒

移居別舊舍

十載相依處今宵忍別離小窗明月夜深院畫眉時去
去愁無路行行步較遲庭梅解入意落盡最繁枝

憶懿卿佩瑱兩姑關中

秋半梧桐葉漸殘
函關西去路漫漫
同懸明月三千里
獨倚西風十二闌
庭際有花零玉露
天涯極目候青鸞
遙思此夕深閨侶
空憶江南夢到難

秋宮怨

鵲鏡慵開塵霧蒙
笙歌遙度粉牆東
瑤階夜散梧桐雨
紫禁秋高荷芰風
鳳輦不來花閣淡
羊車何處月朦朧
此生難識君王面
玉腕年年繫守宮

題秋江送別便面

送別空江上涼風滿客舟離情同岸柳搖落不勝秋

答趙夫人寄慰

乍得山中信挑燈憶昔期別來空有句強半悼亡詩

春盡

片片紅英落盡萋萋芳草欲迷暖風忽送春去深院無人鳥啼

南歸贈別兩姑侍二尊人在關中

東風吹雁各分飛
柳色青青戀夕暉
此去影娥池上月
照人千里一帆歸

送周夫人歸松陵

目送飛鴻無那愁
西風颯颯水悠悠
可憐垂柳多搖落
難向秋江挽去舟

詠梅

冰玉孤清世外姿
娟娟新月上疎枝
無情短笛休輕弄
未是春風點額時

柳枝詞

綠樹陰深映酒旗
欲牽春色上高枝
年年為惜行人別
折盡東風總不知

采蓮曲

新栽白苧泛清溪
一棹煙波香霧迷
競摘荷花憐並蒂
橫塘歌罷月痕低

會稽女子題三詩于驛亭
寫其哀恨予已兩次
其韻為和因復賦此悼之

朦朧斜月淡雲封不寐愁聞夜半鐘綵筆漫傳心上事
淚痕多處墨痕濃

遲凝秀姊不至

風吹細雨溼窗紗寶鴨香消一縷斜薄暮酒闌人不到
一枝春信負梅花

沈靜專

靜專字曼君吳江詞隱先生幼女適嘉興吳文學
昌運早寡著有適適草一卷蔥蒨鬱蔚居然風雅

其字句局法非閨中人所知

鴛湖春日送別女伴之武林

樹合雲陰欲問鳩可能喚雨阻行舟紅翻詞影花因瘦
綠剪情絲柳亦愁無計慰留鴛水夢有懷難寄虎林遊
春風吹斷長天月殘緒應飛暮嶺頭

女伴隨任遠行懷念不真得書至因賦

片香紅燼雨疑晴燕子分波紫羽輕空有淡煙扶晚照
豈堪落月入離情將殘春影憐梅信欲醒秋痕寫笛聲

最是夢回難放下何期青鳥破愁城

竹枝詞

妾住橫塘小有天數株楊柳綠於煙
深池淺池俱種藕
要使郎君多見蓮

芙蓉

紫煙吹斷綠萍稀霧捲輕綃寒月圓
圖出冶容香欲起
彩鸞中夜洛川歸

夜泛

水光蒼淡暮江風生怕鳴榔起睡鴻分得芙蓉霜袂冷
一天煙靄月明中

黃德貞

德貞字月輝嘉興文學孫曾楠室少工詩賦與歸
素英輩為詞壇主持共輯名閨詩選二女蘭媛蕙
媛俱能文子渭璜亦名下士著有冰玉雪椒避葉
蕉夢諸稿劈蓮詞鼓吹所選止悼亡一律

芙蓉石

在杭州南關署
中為陸主政賦

鬱林曾詫翠玲瓏
權署光凝柱笏雄
半壁煙嵐矜玉立
一簾香雨冒花叢
筠依夕影寒生碧
苔掩秋稜色印紅
自是珠宮分蕊出
堅貞應與使君同

悼亡

陰雲慘淡月無光
鐵骨寒飛六月霜
秋水倒流驚化石
溪煙不動怨鳴蜩
緱山鶴馭空迴首
巫峽猿聲總斷腸
薤露疾摧庭畔草
悲風吹夢到池塘

新秋坐月次皆令韻

夜靜鳴蛩到處聞碧天如洗絕纖雲忽飄一葉添愁思
獨坐閒庭每憶君

學繡灣

行人猶是說西施歌舞當年刺繡遲香骨只今何處所
雲迷荒草曉風吹

屠蒞佩

蒞佩字瑤芳德貞子婦文學孫渭璜室著有咽露
吟鈿奩遺詠其小詞情思婉約不讓乃姑

觀沈氏諸姬演劇

梨園喜見屬紅妝三五娉婷出洞房檀口鶯聲歌細細
柳枝蝶態舞將將冠簪雅步叅軍度粉墨塗顏傖父行
底事酒闌人未散月明照徹錦雲裳

徐範

範字儀靜號玉卿嘉興徐海門之女海門善書範
童而習之又工畫梅蘭家貧日夜泮泮統以給食
齊眉唱詠以終稿曰紅餘沈夫人紉蘭梓而傳之

夜讀效顰集

篝火暗石壁披衿啟寒牖一讀一叫絕滿紙墮星斗何
來覆瓿物呵咤百靈走每爾出一義曾未古今剖或粲
如秋花亭亭露光厚含情未得采寒鮮忽脫手或皎如
春泉泠泠應岡阜回風蕩微瀾能使飲者壽或奇如人
面百變不窮有嬉怒生反掌恒情斟酌定守或淡如輕容
弱體不勝負塵香夜初煖顚顚絮小婦七步與八叉知
君未肯後如君古所稀且飲杯中酒

秋海棠

力薄違春夏花開草露中有誰憐夜雨無奈泣寒蟲冷
骨先庭晚秋魂滿地紅自知根蒂弱不敢怨飄風

金陵

虎抱龍關氣未消鍾陵蔥鬱正干霄秋風鐵騎悲三國
夜雨歌魂怨六朝燕子磯邊雲自起鷄籠山畔鳥空謠
隔江玉樹聲何杳惟有沙頭晚落潮

雁字

弔月書空氣自豪墨池潁出似寒濤至文傳處原無本
好字書成不在毫豈逐渚禽栖斷岸每隨飛雪過衡臯
江南梁稻村村有何事年年往復勞

夏閨

綠楊影裏坐啼鴉蕙草纔香月又斜閒對小窓無一事
戲拈餘墨寫蘭花

落花

風雨憂春盡蜂聲見所思明年花發處只在此空枝

周蘭秀

蘭秀字淑英一作弱英吳江周應懿女孫平湖孫
愚公之室也其母沈媛著聲香奩淑英秉其家學
雅善吟詠王端淑稱其出口妍冷自非凡品有粲
花遺稿未刻其死也愚公有悼內四詩見前

春日乍浦舟中作

芳草重重綠遶坡遊情澹遠欲如何無端紈扇因風墮
是處桃花映水多榜女自依煙渚笑林鶯初到客樽歌

山光為共春光醉歸權沿溪一逶迤

和外君帳中梅影

一縷春窓淡淡光疎梅清影落寒牀生綃半幅留飛白
焦墨一枝吹冷香邀月對人孤作癖須花念我笑空忙
那堪夢與羅浮遠曉色臨池並照妝

駕湖煮茶亭相傳坡公三過遺址尚存

習習風清乞士家十年三過關名茶夕翻珠月分鷗浪
春試縹緲泛乳花賸見亭荒猶浦溱却疑人在此葦葭

茲湖一借眉山重品第堪從陸羽誇

題松陵楊夫人墨繡

擘積春工闢豔忙那知子墨寸絲藏六朝金粉刪鴛譜
百疊煙雲落繡牀手浣露香翻紫脫縷飄湘素冷玄霜
君家穎握珍如許蘇蕙恒嫌錦字長

詠雙蘭

雙蕊怯霜殘孤窗惜曉寒祇應圖並蒂留照落輕紈

春日寫竹寄姊沈夫人

新籜初舒雨後枝
碧含香破淡相宜
為君寫出疎欄影
一片寒光照墨池

曉起

曉風疎柳挂樓西
霧合秋窓半欲迷
衾冷不堪重索夢
黃鸝飛向隔花啼

輓詩五首

有序

古人云今古駛同拍
球榮名迅譬石火影
徂心在未若文章之
無窮我姨葉宛君夫
人及昭齊瓊章兩姊

氏風情秀月洛誦成河雖紫玉飛煙睽佳人之不再
而瓊枝照案憐逝魄之猶香聊托遙思綴茲數絕敢
謂平章有當庶匪淚至無端爾

三生石上指空彈讀罷楞嚴靜裏觀塵土何堪埋玉樹
梨花小閣又春寒

十詠探梅護徑苔柔情端不為春來琴亡誰譜江南弄
空使疎香度夜臺

柳絮因風淡遠空海棠照夜霧溟濛莫愁強字盧家婦

閉影梨花香雪中

悵情瓊蕊弄春冰
悄軒窗日數憑
百結迴腸魂縹緲
充箱漫貴剡溪藤

十七齡來聚沫餘
芙蓉城冷待爰居
臂文朱縷他年識
祇恐天都署掌書

沈瑤華

瑤華進士項鼎鉉妻秀水人鳳華妹

詠庭前牽牛花

望遠雲凝袖妝餘黛散鈿縹囊承曉露翠蓋拂秋煙嚮
慕非葵比凋零在槿先才供少頃玩空廢日高眠

遊仙詩

虛皇宮闕九層臺瑤草琪花位置栽三十六雙朱色鳳
徊翔對待玉妃來

沈翠華

翠華文學屠懋和妻嘉興人瑤華妹

遊仙詩二首

蓮瓣相傳大士舟輕紅淡綠遶江流只今跳出污泥窟
碧浪三山汗漫遊

閨苑仙桃初熟釀丹札金書宜共賞飛瓊萼綠並驚馳
三十六峰天籟響

山大家錢婉

婉山萬春妻嘉興人

采蓮

雨餘風爽試輕羅薄暮蘭舟采芰荷看去自憐顏色好

摘來猶覺苦心多

冬日即事

遙看春色遠坐待晚霞生
擁被風憐鬢開窓雪滿城
梅花將有信桐葉轉無聲
但寫歲寒句相思寄遠行

徐月英

月英嘉興名妓

送人

惆悵人間萬事遠兩人同去一人歸
生憎平望亭前水

忍照鴛鴦相背飛

青我居士姚氏

姚氏號青我居士嘉興范應宮室人扶牀誦書博
通羣籍二十六而卒有玉鴛閣遺稿屠隆為序王
端淑曰青我詩骨寒思宵氣清意冷下筆獨別

春閨

芳杜傷心碧空庭花雨飄鳥銜幽夢去柳綰別魂遙青
被藏金鴨紅樓冷玉簫不關離思苦金粉為誰銷

即事二首

晚煙翠出草亭斜
曲曲溪村小築家
幾點病鷗眠夜月
半牀殘雪照梨花

簾捲輕寒春帳空
夢殘芳草雨推風
隔窓陣陣聲偏急
狼籍庭前一夜紅

題夢寄

半牀蝴蝶迷春思
一枕離魂逐恨飛
密帳重幃關不住
月斜樓上伴君歸

溪屋

數椽竹屋傍溪沙
隔斷煙雲人迹賒
漫看前汀浸寒月
蛩聲淒老白蘋花

黃少女雙蕙

雙蕙字柔嘉
叅政黃承昊仲女
間靚雅善吟詠
柔嘉髫年禪悅
絕意家室
嘗誦經聞鳥聲
有詩云
迦陵可解西來意
又報人間夢不長
年十六而卒
叅政從妹淑德
字柔卿
猶子茂仲
婦項孟晚皆有

集傳世彤管之盛萃于一門近代所未有也有閨
禪剩詠王端淑曰柔嘉詩質淡無求工意而下筆
獨潔淫哇豔曲中得此如古琴三弄

家嚴忤璫被放南歸

雲外蒼茫苦問津乍驚鄉夢轉思尊幾番抗疏惟憂國
半老歸田始作民解綬已深泉石願全生何戀宰官身
風前楊柳依然綠誰訊孤舟野水濱

北上因伯兄抱病復回旬日以志悲喜

柳色河橋更幾春
驚心南北苦迷津
維摩病室重相見
疑是天涯夢裏身

和會稽女子

憔悴天涯問阿誰
若為多露獨含悲
空憐子夜孤亭淚
盡作霜楓帶雨垂

伎人薛素

素字素素又字素卿
吳人萬厯中金陵妓
能詩工畫花鳥人物
畫大士白描尤勝
善彈走馬以女俠

自命置彈于小婢額上彈去而婢不知廣陵陸弼
觀素素挾彈歌云酒酣請為挾彈戲結束單衣聊
一試微纏紅袖袒半鞦側度雲鬟引雙臂侍兒拈
丸著髮端迴身中之丸並墜言遲更疾却應手欲
發未停偏有致自此江湖俠少年皆慕稱薛五矣
少遊燕中與五陵年少挾彈出郊連騎遨遊觀者
如堵為李征蠻所嬖其畫像傳入蠻峒酉陽彭宣
慰深慕好之吳人馮生自詭能致素素費金錢無

算久之語不售宣尉怒羈留峒中十餘年乃遣北
里名姬至于傾動蠻夷古所希有也與海內諸名
士交嗣遊吾郡中年長齋禮佛數嫁皆不終沈孝
廉德符納之譚梁生作詩嘲沈云祇知好女意娉
婷誰別麻姑老少形伎倆指尖成狡獪翻堪搔癢
在丹青晚歸吳下富家翁為房老以死

別蔡幼嶷

記得相逢二月春桃花如錦草如裀黃鸝兩兩音載好

楊柳絲絲綰住人，千金不惜重然諾。
意氣慷慨欣所托，比翼鳥兮連理枝。
私語丁寧莫教錯，那堪風雨妬芳菲。
太息春光得幾時，自是鴛鴦驚夢斷。
翻成一段別離悲，羅衫紅溼啼痕透。
可憐酒醒愁依舊，須知何處更思君。
月明人靜黃昏後。

謝王徵君百谷叙詩

一篇勞見贈，字字挾煙雲。
藝圃應無我，詞壇獨有君。
偶曾吟拙句，何竟辱雄文。
爭似山陰客，鶩羣報右軍。

秋日同友飲秦淮舟中

二水龍光遠三山王氣連
舟浮桃葉渡客醉菊花天
玉管隨歌扇金釵墮舞筵
幸皆同調者不減挾飛仙

寄友

別路三千里離情十二時
詩成憑寄與一字一相思

飲吳太學伯載齋中

楊柳簾櫳綠蔭多黃鸝庭院午
風和共憐酒似秦淮水
痛飲愁聽玉樹歌

畫蘭

空谷佳人絕世姿
翠羅為帶玉為肌
獨憐錯雜蕭蕭草
一段幽香祇自知

畫蘭竹題贈蘇時欽

翠竹幽蘭入畫雙
清芬勁節伴閒窓
知君已得峨眉秀
我亦前身在錦江

雨夜

江城漏轉夜迢迢
誰共青尊伴寂寥
挑盡銀燈不成寐

半簾風雨嚮芭蕉

伎人周文

文字綺生吳門良家女流落為嘉興妓所得遂為
嘉興人聰敏有殊色能詩善小楷與姚士粦楊瑞
枝交好樵李縉紳好文墨者每召綺生即席分韻
以為風流勝事綺生微辭多所譏評有押池韻用
習家池者綺生笑曰無乃太遠乎諸公拂衣而起
綺生嘗有詩曰掃眉才子多相思未敢人前說校

書蓋自傷也新安王太古詞場老宿見綺生詩擊
節曰薛洪度劉采春今再見矣李本寧流寓廣陵
與陸無從顧所建結淮南社太古攜綺生詩詫諸
公曰吾能致綺生入淮南以張吾軍諸公大喜相
與買舟具裝各賦四絕句以祖其行太古比及吳
門松陵一元氏者已負之而趨矣綺生既屬身養
卒敝衣毀容重自摧廢晨夕炷香于佛前祈死不
復為詩時作小詞寓意一元氏以五七言迴環讀

之迄不得句綺生乃開顏一笑也嘗有句云侍兒
不解春愁報道杏花零落知者咸傷之後歸沈同
和沈素不好文色衰見棄遂杜門茹素以終沈千
秋寄綺生詩有空餘屐齒斜陽裏記得春心楊柳
邊王端淑謂綺生有文心而無慧眼失身瑣類悔
何及哉

遊韜光菴與沈千秋分韻

轉徑白雲近回風清磬殘霜花欺客眼江雁怯秋翰片

石泉聲細千峰日影寒煙深鳥不語歸路已漫漫

夏日和友人見贈并謝蘭膏名酒

題徧碧苔箋吟殘綠水篇流霞穿樹出明月隔溪懸乍
聽聲聲笛還逢汎汎船琴心誰共識山水自相憐

渡口

一水如斯逝滔滔不便休橋分南北岸樹繫去來舟竹
粉饒鳥啄花房倦蝶留汎多漁父引予亦漫從遊

答華南子

老大羞顏鏡多君寄遠詩素槭開豔玉上苑折新枝三
月孤村雨十年滄海思自來焚筆硯何以謝相知

過吳門懷舊

香殘帶緩不勝愁又見蕭條一片秋身到故鄉翻是客
心隨明月許同舟數聲新雁凌江下幾點寒鴉逐水流
遮莫生平多少恨閒吟欹枕更悠悠

送人

愁人數行淚不許秋風吹吹入長江裏江流無盡時

口占

金炊玉饌滿行厨，不惜傾囊向酒壚。
忽漫相逢便相許，比來專畏霍家奴。

為訥齋贈歌者玉蘭

娥娥紅粉惜春樓，座客能銷徹夜愁。
不是新聲名擅早，如何偏解唱涼州。

同屠庚肱董遐周駱天游游武林西山得厨字
偕遊玉勒紫騮駒，雲白山青去路迂。
不借僧寮炊午頓。

竹煙一片繞行厨

項隱君珮

珮字吹聆秀水人文學吳巨手內子能書擅畫喜
讀書工詩本以貴族令淑國破家亡與其君子偕
隱荒村諷詠自若誠可謂安貧樂遊白首相莊者
著有藕花樓集一卷雪灘陳太史盟為序未刻王
端淑曰鴛水為人文數吹聆具賢淑之姿聰敏之
質為詩高老不減三唐

朗雲堂家集次孔彰兄韻

詩壇此夕並賢宗彤管風微亦我容月轉簾櫳排雁序
雲深庭砌護芝茸本無金谷繁華慕祇似蘭亭少長逢
檢點溪藤兼石墨老兄雙袖未龍鍾

雪後贈鍾姊姚夫人

太傅門風舊所思新歡得繫鳶蘿絲

夫人弟真遠才士
也有女許字易兒

女嬃不詈申椒賦道蘊原嫺若柳詩寶髻雲光青鳳羽
羅衫花樣碧桃枝野漁未漉山南酒白雪遙觴女導師

題外居己齋

葦齋遴製雅名已較蕭殊秋水盈盈碧幽欄曲曲朱影
分金粟字光引日南珠觀世悲同佛開家慶有儒非封
從說項牛斗式躔吳薤篆新題額螺文舊湧膜當軒宜
獨寤側席儼雙趺憂國逾簪組談空異芻牀塵琴靜
拭庭草鶴歸扶解畫襄陽孟曾師安定胡何賓言自牖
有婦學搯觚管叶飛隨鳳絲深隱鑒蛛窮安君子固疾
禱衆生無室是維摩幻顏非子夏臞六憲隨便應一榻

懶輕敷經緯
叅前謝風流
擁大蘓聯吟
單作甫合燭
耦猶吾啟幕
明星爛翔翔
弋曉晃

送外

已識風塵苦
經春又別離
釣船迎水去
無處不牽絲

閏午夢堂返生香集追賦

霏霏玉影未全虛
照眼分明白鹿車
夢到不堪重夢處
淒風吹滅舊遺書

返生香
燕返生時
莫倚青蛾認舊眉
絕世才華消不得

自應長揖作男兒

歸隱君淑芬

淑芬字素英嘉興人文學高陽繼室夫婦偕隱初
居花村晚遷香溪有雲和閣集崇禎間嘗與秋涇
黃月輝德貞吳門申蘭芳蕙共輯名閨詩百花詞
歸自為序兼工書畫然筆墨珍惜購之不多得也

村居除夕

爆竹荒村少蕭條四壁虛幕連殘日捲春向早梅舒蓬

鬢來朝整愁心此夜除屠蘓相對飲守歲只繙書

早秋懷外君遊武林

一葉飄金井鳴蛩怨早秋徘徊閒對月寂寞自登樓
嬾看雙星會端居萬籟幽無眠難入夢何以慰離愁

題陸右黃徐夫人畫

茅屋疎籬近水開前峰疊疊樹如苔雖然有路通樵採
截斷煙雲未許來

詠喚嬌娘次申蘭芳韻

隱隱聲傳綺閣中何愁巧畫繡難工休猜仙珮凌風度
且數青蛱換綵絨

申賢媛蕙

蕙字蘭芳吳門申文定公曾孫女適秀水沈廷植
草書法孫過庭詩蒼老不作閨閣中語有縫雲閣
集與淑芳齊名世稱二雲閣詩草云

秋日宴別金陵葉夫人

昔別虎丘下今逢駕水前停橈黃葉浦把盞白雲天去

路恰千里看山剛半年天涯戀知己各為檢詩篇

林屋洞

龍洞雲封處千山路半迷常年人不到終日鳥空啼石
泐蒼苔護瀑懸晴雪低有懷探玉簡一傍隔凡栖

秋日登屏山

樹密影重重秋聲萬壑同不知山上月剛到竹林東

出郭

出郭尋春日未斜行來溪畔兩三家枯藤半束疎籬外

一路寒梅未放花

春睡

深院迴廊鎖綠楊
閨中午睡夢初長
只嫌春懶慵鍼線
燕落香泥污繡牀

楊柳詞

楊柳青青燕子遲
曉風初月挂相思
欲添鏡裏新蛾樣
揀得樓東第一枝

題畫

結廬斜傍白雲中萬壑濤聲松際通
林外有人知問渡深山不盡晚來風

長春姐

長春姐嘉興人黃氏婢寒山陸夫人嘗以詩贈之
云剪破楚山雲繪作芙蓉履有時渡湘江片片隨
流水著有惜春記事

曉妝作

漫學吳姬作淡妝枕痕未減夜來香
花簪碧玉扶雲髻

妬殺尋常姊妹行

和會稽女子驛亭二絕

弱質何堪馬上塵
失身誰復更憐身
傷心不作還家夢
孤負江南一夜春

情緒紛紛訴向誰
昔時脂粉盡成悲
青燈此夕憐孤影
何事天涯不淚垂

伎人吳綺

綺字繡君嘉興妓
與孝廉朱治憫甚
暱崇禎末朱

棄其妻而娶之從宦東粵不知所終

自題蘭石

清影留紈素疎香隱石苔風微無所著濃淡有由來

冬日畫蘭使面

幽意隨有得呵凍聊寫生真堪紉作佩霜霰不勝情

伎人徐翹

翹字雪翹嘉興妓人女小字阿佛性慧能詩隨母

遷吳江盛澤遂著聲青樓間每同當湖武原諸公

遊然心厭穠華常與一士有所約不果因作秋怨
詩後歸貴介周某周卒祝髮為尼

秋怨五首

有引

獨處善懷涼秋易怨兼以病骨支離而永好中絕彤管
在御聊代護蘓以寫幽憂云爾非敢擬盤中作也

自許恩情百歲同那堪棄置任秋風開簾見月還羞月
似笑齊紈筓篋中

露華點砌舞衣單人在空房怯倚闌記得與歡相傍處

夜來風雨不知寒

枕接離痕兩自知
空牀無語只疑癡
鸚歌不量伊人遠
只管窓前喚畫眉

錦簾孤棲燈炮青
薰籠斜倚漏三更
西風欲破人愁寂
吹入芭蕉作雨聲

蕭瑟還同落葉蟬
輸他吸露飽風煙
乍拚身試相思味
檢點腰肢足可憐

姜月上

月上烏程比部潘湛妾嘉興人

贈黃給諫夫人

楓落吳江一葉輕
自憐踪迹任浮萍
殷勤記取池邊柳
曾入東風眼倍青

懷黃夫人

時夫人
赴閩

雁字雲飛杳遠思
思君惟日誦君詩
梅花我自江南寄
望到香籠新荔枝

鴛湖女郎

女郎不知何許人見草堂詩餘王端淑曰情詞兼
到開口媚利使人吁絕

鴛鴦湖竹枝

鴛鴦湖上浪生花煙雨樓頭月吐華此夜與君溪上別
夢隨水月到君家

寓鴛湖女子

女子楚人明季隨父宦白門南都失守父歿於任
有母黨宦浙欲往依焉同母舟過嘉興遇中表某

生亦避亂寓此一枝暫憩生亦才貌俱優女私與
訂盟未五月而郡城復破生隨軍北行勢不能還
寄詩通問女子得詩感和隨病而亡念女初未字
與改節不同卒至死不貳與守貞何異其偶存四
詠亦非白頭吟胡笳拍比時逢兵燹遷徙無常亦
恐墮家聲秘勿敢語故鮮有知之者竟陵江楚望
為女之至戚出詩以示人并述其由有雪溪蔓故
翁者梓之以傳

和某生詩四首


文士非無行其如薄命何
今空思化石昔悔不投梭
紅葉詩猶在青春日易過
自憐憔悴甚懶復畫雙蛾

多病腰肢瘦年來減幾分
奩餘螺子黛箱疊石榴裙
恨解江妃佩羞迴織錦文
屢憎春夢惡相見尚慙勤

追憶從前事空閨漫自評
君何曾薄倖妾愧負多情
書寄人千里燈挑夜五更
別留衣帶字磨滅不分明

踐盟原不易況值世情涼
自分姻緣短空嗟歲月長
簫

聲孤彩鳳燕語傲雕梁共訝癡兒女無端涕滿眶



橋李詩繫卷三十四